

# Gedanka iwwer de Lebenslaaf vun MALSCH

Zwölfhundert Jahr ...  
e länge Zeit,  
un grad gnungk isch bassiert  
vun dort bis heit.  
Scho wieviel Generationa  
komma un vorrgänga?  
E ganze Stadt voll Leit  
däd des jetz länga.  
Un was die zamma alles  
mitgmacht häwwa,  
des miißt e große Biblodek voll  
Bücher gäwwa.

De Oofang isch noch ziemlich  
neweldriib.  
Grad uff ladeinisch  
so en korzer Schrieb,  
wu e benämsde Edelfraa  
mit secht,  
daß ze em Kloschder Lorsch  
ebbes vorrmecht  
vum Weiler Maischen -  
Wissa, Feld un Wald,  
mit Haus un Hof un Leit drinn,  
jung un alt.  
Un wie sich schbäder aa noch  
lesa läßt:  
s isch halt en sellra Zeit  
so Mode gwest,  
daß mer, wies oim grad baßt,  
e Dorf vorrschenkt.  
En d'Leit un ihra Winsen  
hat niemeds denkt.  
Die meenschda senn

leibaiga gwest un Knecht,  
mit schwera Pflighda  
un mit wennich Recht.

Sie häwwa ihra Läbdag  
gschufft un gfreent.  
Johrhundertläng hat's Volk  
arg drunder gschdeehnt.  
Un fuffzeahundertfinfezwänzig  
en de Oschderwocha,  
do isch nor denna (Malscher) Baura  
ihren Zorn ausbrocha,  
weil mer de Leit net oogschdrooft  
uffem Kopf romdänzt.  
Sie häwwa sich em Letzaberg  
vorrshänzt  
un senn bis Rodaberg  
un Kislau komma  
un häwwa sgänz Gebiet  
em Händschdraich gnomma.  
De Uffschdänd hat se freilich  
wennich badd.  
Sie häwwes do druff  
net viel besser ghadd.

Un doch isch aa en Lichtblick  
noch debei:  
Om MALSCH rom wagst scho läng  
en guder Wei,  
un en de Biwl lest mers  
net als Scherz:  
De Wei erfrait  
e Menscha Herz.

Jetz hat e Dorf  
sich rauskrischdalisiert,  
wu mer de Fleiß  
vun seinä Birger schbiirt.  
Idyllisch glega,  
grad em Kraichgauränd.  
Kraismäßig ischs en Dail  
Kurpfälzer Land.  
Un ebbes Bsunders  
isch vun Maisch noch zsaga:  
shat em Reformakampf  
sich prima gschlaga.  
Selbschdändlich ischs,  
wie kaum e anders, bliewa,  
un aa sein Noma  
ward noch heit so gschriewa.

De Freihaitsdräng vun friier  
isch erhalda.  
Die MALSCHER därfa ihra Dorf  
allooi vorrwalda.

Jetz bleibt zum groða Fesch  
en Wunsch noch frei:

Em JUBILAR  
un seinä BIRGER  
viel ERFOLG  
un GLICK debei!

Irma Guggolz  
13. Mai 1983